

# Powšitkowne WOZJEWJENJA

njedźelu, 6. oktobra 2019

## Hudźbny nyšpor w Baćonju

Towarstwo Cyrila a Metoda přeprašuje zhromadnje z Baćońskej wosadu na hudźbny nyšpor k spominanju na 225. posmjertniny kěrlušerja, kanonika a šolastika Michała Wałdy, kotryž wotměje so njedźelu, 13. oktobra, w 14 hodź. w Baćońskej cyrkwi. Chróšćanski cyrkwinski chór jón wuhotuje.

## Eksercicije za Serbow – „Što nas wozboža?“

Lětuše eksercicije za Serbow budu wot pjatka, 8. nowembra, wječora hač do njedźele, 10. nowembra, připołdnja pod temu „Što nas wozboža?“. Wěriwi ze serbskich wosadow su přeprašeni, so na tutech dnjach wobdźelić. Přizjewjenja přijimuju direktnje w Exerzitienhaus HohenEichen, Dresdner Str. 73, 01326 Dresden, info@haus-hoheneichen.de, telefonowe čisło (03 51) 2 61 64 10 abo w Chróšćicach na farje, telefonowe čisło (03 57 96) 80 40 22.

## Mandźelski seminar

Přizjewjenja za přihot na sakrament mandźelstwa wot pjatka do soboty, 29. nowembra do 30. nowembra, přijimuju so pisomnje hač do srjedy, 6. nowembra, w Dekanatnym dušepastyrstwje we Worklecach. Formularjy k tomu su w cyrkwjach wupožžene.

## Dalši serbski žarowanski kruh

Žarowanskaj přewodźerjej Regina Krawcowa ze Smječkec a Tomaš Pěčka ze Ser-njan poskićataj zhromadnje z dr. Ludmilu Lajderowej z Drježdźan po lońšim zazběhu dalši serbski žarowanski kruh. Přenje zetkanje budže štwórtk, 7. nowembra, w 17.00 hodź. w Chróšćanskej putniskej hospodze. Dalše terminy su stajnje tři njedźele pozdžišo. Předwidžane je, zo so tutón kruh hač do spočatka apryla wosom króc zetka. Zajimcy měli so pod telefonowym čislom (01 74) 7 01 94 87 přizjewić.

## Film „Das größte Geschenk“

W dokumentarnym filmje „Das größte Geschenk“ z lěta 2018 zaběra so španiski režiser Juan Manuel Cotelo z temu, kotraž wšitkich potrjechi – wodawanje. Maćerje, nаноjo, wudowy, syroty, masowy mordar a jeći na jimace wašnje rozprawjeja, kak móžeš wodać. Režiser Cotelo zetka so z woporami kaž skućićelemi. Słuchaše na wobě stronje a smědžeše filmować, hdyž so wobě stronje zetkaštej a sej wujednawacu ruku podaštej. Film „Das größte Geschenk“ pokazaja na reformaciskim dnu štwórtk, 31. oktobra, w 17.30 hodź. w Drježdźanskim kulojtym kinje Cineplex.

## Adwentne dny za seniorow w Smochćicach

Dom biskopa Bena w Smochćicach přeprašuje seniorow a dalšich zajimcow na adwentne dny, kotrež wotměja so wot pónđzele do štwórtka, 2. do 5. decembra. Zhromadnje chcedža na nich wo křesćanskich tradicijach w adwenće rozmyslować, so modlić a tohorunja kreatiwni być. Nadrobny program nańdu zajimcy na internetowej stronje [www.benno-haus.de](http://www.benno-haus.de). Naprašowanja a přizjewjenja su móžne hač do štwórtka, 10. oktobra, pak telefonisce pod čislom (03 59 35) 2 23 16 abo z mailku na [info@benno-haus.de](mailto:info@benno-haus.de).